

Br:

7/1904/26-810

30. januar 2026.

IZVJEŠTAJ

o učešću potpredsjednika Vlade za međunarodne odnose i ministra vanjskih poslova mr Ervina Ibrahimovića na drugom ministarskom sastanku u okviru Balkanske mirovne platforme, Istanbul, Republika Turska, 23. januar 2026. godine

Drugi ministarski sastanak u okviru Balkanske mirovne platforme održan je u Istanbulu, Republika Turska, 23. januara 2026. godine. Domaćin sastanka je bio ministar vanjskih poslova Republike Turske Hakan Fidan, koji je pokrenuo ovu regionalnu inicijativu ministara vanjskih poslova Zapadnog Balkana i Turske sa ciljem uspostavljanja foruma za neformalni dijalog i koordinaciju među najbližim partnerima, a kako bi se dodatno unaprijedila regionalna saradnja, dijalog i stabilnost na Zapadnom Balkanu. Delegaciju Crne Gore na drugom ministarskom sastanku Balkanske mirovne platforme je predvodio potpredsjednik Vlade za međunarodne odnose i ministar vanjskih poslova mr Ervin Ibrahimović, a delegaciju su činili: Branislav Karadžić, generalni konzul Crne Gore u Istanbulu, Dragana Šćepanović, direktorica Direkcije za zajedničku vanjsku i bezbjednosnu politiku EU u Generalnom direktoratu MVP za Evropsku uniju i Jovana Duković, prva sekretarka u Kabinetu ministra vanjskih poslova. Pored domaćina mvp Turske Hakana Fidana i ppv i mvp Crne Gore mr Ervina Ibrahimovića, na sastanku su učestvovali i ministri vanjskih poslova Albanije, Bosne i Hercegovine, Kosova, Sjeverne Makedonije i Srbije.

Na drugom ministarskom sastanku je razgovarano o jačanju regionalne stabilnosti kroz otvoreni politički dijalog, unapređenju međusobne saradnje i izgradnji povjerenja među državama regiona. Učesnici su potvrdili zajedničku posvećenost produbljivanju dijaloga i razmatranju mogućnosti za definisanje zajedničkih projekata u oblasti povezanosti, energetske bezbjednosti i digitalizacije, omladinskih i obrazovnih politika, vojne industrije i pitanja od zajedničkog interesa u okviru evropskih integracija koji bi doprinijeli prosperitetu i dugoročnoj stabilnosti regiona. Potpredsjednik Vlade i ministar vanjskih poslova Ibrahimović je istakao da značaj Balkanske mirovne platforme leži u njenoj sposobnosti da povezuje države regiona kroz inkluzivan dijalog i konkretne oblike saradnje, naglašavajući da su inicijative koje promovišu mir, razumijevanje i partnerstvo od ključnog značaja za region koji nosi složeno historijsko nasljeđe. Ppv i ministar Ibrahimović je naglasio da Crna Gora pridaje poseban značaj regionalnoj saradnji i dobrosusjedskim odnosima, koji predstavljaju temelj njenog evropskog puta. Podsjetio je da je Crna Gora tokom 2025. godine zatvorila šest pregovaračkih poglavlja sa Evropskom unijom, a da će za koji dan zatvoriti još jedno poglavlje, ocijenivši taj rezultat ne samo kao tehnički uspjeh, već i kao potvrdu političke zrelosti i institucionalne kredibilitnosti države. U svom obraćanju, potpredsjednik Vlade i ministar Ibrahimović je ponovio da Crna Gora ostaje čvrsto posvećena cilju da 2026. godine postane naredna članica Evropske unije, uz uvjerenje da su regionalna stabilnost i saradnja nezamjenjivi preduslovi tog procesa. Ibrahimović je, takođe, naglasio spremnost Crne Gore da, u duhu solidarnosti, podijeli svoja iskustva sa ostalim kandidatima za članstvo, kako bi

cijeli region Zapadnog Balkana napredovao ka EU u doglednoj budućnosti. Osvrćući se na ulogu Republike Turske u jačanju Balkanske mirovne platforme kao mehanizma za snaženje saradnje, potpredsjednik Vlade i ministar Ibrahimović je dodao da Crna Gora pridaje veliki značaj odnosima sa Republikom Turskom, koji su duboko ukorijenjeni u istorijskim vezama, kontaktima među ljudima, ekonomskoj saradnji i zajedničkoj odgovornosti za stabilnost Jugoistočne Evrope. Zaključio je da Balkanska mirovna platforma pruža priliku da dijalog uvijek bude na prvom mjestu, te da će Crna Gora nastaviti da djeluje kao konstruktivan, pouzdan i odgovoran partner, posvećen miru, saradnji, evropskim vrijednostima, snažnim odnosima sa Republikom Turskom i izgradnji regiona koji će biti obilježen zajedničkim povjerenjem u budućnost, a ne podjelama iz prošlosti.

Na marginama sastanka Balkanske mirovne platforme, ppv i mvp Ibrahimović je imao odvojeni susret sa ministrom Republike Turske Hakanom Fidanom. Fokus razgovora bio je na situaciju u pojedinačnim zemljama regiona, i u tom pogledu razmijenjena mišljenja dva homologa, kao i na saradnju Crne Gore i Republike Turske, te integracioni put Crne Gore. Sastanak je bio prilika da se još jednom potvrdi značaj prijateljskih veza i konstruktivne saradnje Crne Gore i Turske. Nakon Drugog sastanka Balkanske mirovne platforme, upriličen je, sastanak svih ministara vanjskih poslova država Zapadnog Balkana sa predsjednikom Republike Turske Redžepom Tajipom Erdoganom.

Drugi ministarski sastanak Balkanske mirovne platforme bio je dobra prilika da ministri vanjskih poslova država Zapadnog Balkana i Turske u direktnoj komunikaciji razmijene mišljenja i stavove o mnogim pitanjima od značaja za region. Učešće ppv i mvp Crne Gore mr Ibrahimovića na drugom ministarskom sastanku Platforme predstavljalo je mogućnost za reafirmaciju posvećenosti Crne Gore regionalnoj saradnji, dobrosusjedskim odnosima i očuvanju stabilnosti na Zapadnom Balkanu, uz iskazivanje spremnosti da Crna Gora dijeli svoja iskustva iz integracionog procesa. Kroz aktivno učešće na ovom Forumu, Crna Gora doprinosi političkom dijalogu, razmjeni iskustava i zajedničkom rješavanju regionalnih izazova, istovremeno jačajući svoju poziciju pouzdanog partnera i zagovornika evropskih integracija u regionu.

PREDLOG ZAKLJUČAKA

Vlada Crne Gore je, na sjednici od _____ 2026, razmotrila i usvojila Izvještaj o učešću potpredsjednika Vlade za međunarodne odnose i ministra vanjskih poslova mr Ervina Ibrahimovića na drugom ministarskom sastanku u okviru Balkanske mirovne platforme, Istanbul, Republika Turska, 23. januar 2026. godine.